

Mebunun minkukuhav

Ma-aq naak haip a na istaqu ka sia pali-uni mebunun minkukuhav.

Heza tu tatini ka binano-az tu uvaz-az. Mataz a tina ka, kingna ka tama ki binano-az. Heza tu tastuqani-an, mudaan a tama munhaan ludun qanup.

Ilumaq a nai tina ki binano-az tu uvaz-az. Maqetbas a tina kis saduu ki issia eltangusan tu uvaz-az ta. Lusqa nenka undusa-an ilumag ta. Iskalunan i tina ka uvaz-az a mapakuzakuza, na tudiip pakonan i petutonquvali tu qesing.

Ma-aq a uvaz-az a tinsusuu kis iskalunan maqasmav kuzakuza.

Ma-aq tudiip a tupa-un i tina ta tu asikav a lumag, na tudiip in ma-un i qesing siin katkat. Tuza tu kanaqtung in a uvaz-az a ma-asik i lumag, munhaan in tina ta tupa tu isaq a qesing siin katkat na konuk i masoqzang in saak. Antalam a tina tu ihaan deza ta, pisihaluk madenpus. Tuqna ka tina tupa istaa tu, uvaz-az! Uka mita lumag ti ka lukis, Munba-ava ta tilukis na pisdo-un. Tuza tu tinsuu ka uvaz-az a siza ki kaul tinaqis munba-av, mama ki lukis tonalumaq in a, punastu-un a lukis haan pit-a-e-an tu lanqa.

Tuqna ka uvaz-az a tupa ki tina ta tu, “ minsuma in saak tu tinilukis, i-isaq a qesing siin katkat, masoqzang in saak. ” Tupa ka tina tu, “ ihaan deza ta. ” Tuqna-un i tina ka uvaz-az a tupa tu, maningzav tu uka haan bozaq a danum, munsulan ang asu, na mamantuk in tu na pakonan in i

qesing siin katkat, tuza tu tinsuu ka uvaz-az a mudaan munsulan.

Makinahipnhip a uvaz-az a tupa ki tina ta tu, i-isaq a qesing siin katkat i masoqzang in saak.

Antalam tudiip a tina ka tupa tu: uka in a qesing siin katkat i konun i asu. Tindikla sia uvaz-az ta ka is-aang, mudaan munhaan lanqa ta, siza ki qapung tuktukun mapindusa, islasli haan kusuan min-uni pani. Muqna siza ki asik islinsuup haan baqan min-uni ikul, malansan i sinpalusapuz tu qusdul, kusbai medaza tupa tu, “ kukui kukui ” Min-uni in kukuhav. Tinsuu tudiip a tina siza ki katkat qesing samanqa istaa tupa tu, “ musuqesa! Hendii ka qesing un ”.

Ma-aq tu tudiip a, musuqis in a tama sia; saduu ki uvaz-az ta medaza kusbai minkukuhav, tupa amin a tama ki uvaz-az ta tu, “ musuqesa! Hendii ka katkat un ”, minsuuz naip meququ kusbai min-uni kukuhav.

Malmamangqa ka tama sia satulun saduu ka, tenada-an a bungu ki issia kukuhav ta tu usaq ka, tinqeng-ut a mumudan, muqalqal pananastu dalaq, mulingku panahaan ihaul tu hunku, uu ka min-uni dau ki kapingun i bunun tu susas haan hunku ta.

人變老鷹

一位小女孩，媽媽過逝，爸爸再婚。有天，爸爸上山打獵，媽媽跟小女孩在家裡。

媽媽對她說，你去掃地後媽媽才會給你吃飯和鍋皮。掃好後卻沒有讓她吃飯，又叫她去山上撿木材。撿完木材後她還是沒有吃到飯，卻又被指使去挑水回來。等她挑完水回來，媽媽卻跟她說，飯和鍋皮沒有了，被狗吃了。

小孩子非常的難過，回到屋寮那裡，把篩盤切半，一半塞到右腋下，一半塞到左腋下當作翅膀，又去拿掃把塞在皮膚當尾巴，跟著煙往上升，飛上天說，kukui，kukui，她變成老鷹了，媽媽馬上去拿鍋皮和飯望天說，回來！飯在這裡。

那時，她爸爸從山上回來，馬上跟太太說，小孩子怎麼樣啊？她為什麼飛到天上變成老鷹呢？她爸爸也對那小孩子說，回來！鍋皮在這裡，她卻越飛越高變成老鷹。